

IA

DIVER S.
TRAICTES.
HISTOR.

IA

IA

IA

IA



cm 1 2 3 4 5 6 7 8 9 10 11 12 13 14 15

19 18 17 16 15 14 13 12 11 10 9 8 7 6 5 4 3 2 1



113

1015.
1773.
1817.

113

113

113

OE xv
754

Pièce	1.	Daunou	381-	
	2	-	912-	Pellechet-A168 ^{bis}
	3	-	915	- 4618
	4	-	913	
	5	-	914	- 3899
	6	-	916	
	7	-	917	
	8	-	918.	

Toutes les autres pièces sont du XVI^e siècle

EXV 754

ancien L 4° 463

Relure aux armes de
De Mon avant
les deux mariages

OExv
754

Le Triumphe
ET LA POMPE
MAGNIFIQUE,
Faictz aux Baptisailles du Duc Francoys,
filz de Monseigneur le Daulphin,
Celebré a Fontainebleau le
dixiesme Jour du mois
de Feburier.

M. CCCCC. XLIIII.



Imprimé à Tholose, deuant le
College de Foix.



ONSIEVR, Des nouvelles de
pardeca, Le Cardinal de Frenez Le
gat Dauignon & Nepueu du Pape
est de retour a la Court, car estoit alle
en Ambassade deuers L'Empereur, cō
me vous ay rescript par mes dernie
res Lettres, & dict on qu'il a este mal
recueilly. A present lon attend les
nouuelles ou venue du Cardinal du

Bellay & du Chancelier Dalencon quant President de
Paris, qui sont allez en Ambassade a la Diette des Alle
maignes de mandement du Roy, & est le cōmun bruiet
quilz ont trouue difficulte du passaige a leur venue vous
escripray toutes nouuelles. Touchant les faictz de ces
iours passez, Mecredy sixiesme de ce moys Monsieur
Dannebault Marechal de Frāce & Cheualier de lordre
fut faict grand Admiral de France & presta le Serment
au Roy solennellement, & fut crye par le Herault Dar
mes au Chasteau de Fontainebleau. Le leudy ensuy
uant Mōsieur le Daulphin, & Monsieur Dorleans ayās
chascung cent cinquante gentilz Hommes ou plus, tes
rent deux Assaulx es Bastillons qui pour ce leur estoient
dressez à la grand basse Court du Chasteau. Puis ce faict
iouarent au ieu de la Balle, qui faisoit bon veoir, & estoit
vng grand passetemps: mesmemēt au Roy qui estoit sur
vng Eschauffault couuert dung Pauillon bien tapisse,
accōpaigne du Roy de Nauarre, des Seigneurs de Guise
& saint Paul, des Cardinaulx suyuant la Court & aul
tres seigneurs, La Roynie, madame Marguerite, la Prin
cesse de Nauarre, & toute lassemblee des Dames: (Aus
dictz lieux vous eussiez veu mainet bon tour dagillite &
force.) Les gens du quartier de Mōsieur estoient vestuz
de toylle d'argent, de velours & satin blanc, les chausses,
bōnetz, & plumes a laduenant: Ceulx de monsieur Dor

leans de velours rouge cramoyssi, chascū en son endroit
desirant auoir gloire & reputation de les faictz.

¶ Hier qui estoit Dimenche dixiesme de ce moys fu
rent faictz les Baptisailles du ieune Duc Francoys, filz
de Monsieur, ce que ne vueil obmettre vous escrire, &
de la magnificence & ordre qui y fut obserue. Premiere-
ment debuez scauoir q̄ au quartier de madame la Daula-
phine dans vne grand Salle tapissée bien richement a ce
que illecq les Dames s'assemblassent fut dressé vng Liect
riche & sumptueux, au dessus duquel y auoit troys Cielz,
l'ung de drap Dor, l'autre de Velours bleu en broderie se-
me de Fleurs de Lys dor, & le tiers de drap d'argent seme
Dhermines. Le Liect estoit couuert d'une Couverture en-
trelassée de drap Dor sur Velours violet pendants iusques
en terre, avecq deux Aureilliers couuers de Pierrerie a
Houppes de Cramoyssi. Et enuiron quatre heures de
soyr les Dames se rendirent a ladicte Salle vestues d'ac-
coustremens aussi riches que lon aye veu pieca en France
faictz toutz expressement de neuf; comme de drap Dor,
& d'argent, d'orpheurerie, pourphileure, canetille, passemēt
broderie, pierrerie, chaines, bagues, fermeaux, & aultres
doreures, le tout si tresriche que ceulx qui la estoient pre-
sentz nauoyent oncq veu le cas pareil.

Item depuis la Chambre de Madame & au long de la
Gallerie iusques aux degrez faictz pour descendre a la
Chappelle, estoient rendues Tapisseries de Velours vio-
let seme d'attainctes de fil Dor par broderie; le Ciel de sa-
tin cramoyssi a Croix blanches & satin violet a Fleurs de
Lys, festons, Chappeaulx de triumphe, les Armes du
Roy, de la Roynne, de Monsieur, de Madame, & du ieune
Duc, qui sont Escarteleures du chāp de France; de Daula-
phins & Hermines. Les Tapisseries du long des Degrez
iusques a la Chappelle estoient de drap Dor & Velours
cramoyssi seme de Fleurs par poinctes, & le pauc couuert

A ij

de Tapis veluz. Item le Ciel tendu a ladicte Chappelle estoit de satin blanc & violet seme de Fleurs de lys & Hermines. Le tour de ladicte Chappelle estoit de Tappissierie faicte a hystoires par personnaiges apres le naturel, & estoit toute neufue, & dict on q ladicte Tapissierie a couste vingt mille Escutz. Les Chadeliers de ladicte Chappelle estoient tous d'argent ayant haulteur de cinq piedz ou plus, garnyz de Cierges blancs.

Quant vint sur le faillat du iour, les Suysses de la garde & Archers du Roy & de Monsieur vestuz de leurs Hocquetons argentez, furent en la basse Court es lieux a eulx ordonez, ayant chascun deulx vng Flambeau au poing, ensemble tous les Officiers de la maison du Roy & de Monsieur avecq les Pages descuyrie qui estoient environ de cinq a six cens: Dont la clarte desdictz Flambeaux resplandissoit par la place de telle sorte quelle rendoit la nuit presque esgalle au iour. Lors eusiez ouy Tabourins, Phiffres, Trompettes, Cleros, Haulx boys, Cornetz a bouquin, mener & faire telz sons que cestoit chose admirable de la melodie qui resonnoit es Aureilles des assistans. Daultre coste estoit Lartillerie assise au dehors du Chasteau en vng Bastillon pres de Lestang, qui bombardoit a merueilles, tellement que lon eust dict que toutes choses auoyent sentiment naturel, & sinduysoient delles mesmes a solenniser ce Royal Triumphe aussi bien que la noblesse des Princes qui la assistoient: Et estoit la garde du Corps dans les Galleries pour doner ordre a la foule du monde qui la affluoit par si grand nombre que la plus part furent cōtrainctz eulx pourmener & cheminer toute nuit parce quil ny auoit assez lieu pour les heberger a trois lieues a lenuiron: & qui plus est la Court est a present plus grande en Princes & seigneurs q elle ne fut pieca.

Lordre qui fut obserue en ce triumphe estoit tel. En la Chappelle se rendirent premierement Messieurs les Car

dinaulx de Bourbon, & de Gyuri, vestuz pontificallement
auecq leur suite accōpaignedes Châtres de la Chappelle
du Roy: Puis marchoyent en deux couples les Haulxboys
& Cornetz: Apres alloient les Cent gentilz Hōmes de la
maison du Roy chascung son Flambeau au poing, & mar
choient apres lesdictz gentilz Hōmes quatre Escuyers eri
gez pour lestat du ieune Duc, allant aussi apreseulx deux
Maistres Dhostel portans leurs Bastons en la main, vestuz
de Robes de satin blanc richement pourphillees: apres les
quelz alloyēt troys Heraulx Darmes, vestuz de leurs Cotes
tes qui estoit chose de grand magnificence a veoir. Apres
marchoit en grauite audacieuse dune bōne grace Mōsieur
de Neuers portāt Lenseigne en la main vestu dhabillemẽts
blancs, enrichiz de pourphilleures de Perles. Puis apres le
Seigneur de Neuers marchoit Monsieur Dorleans qui por
toit Lenfant entre ses Bras, accompaigne de quatre gentilz
Hōmes, scauoir est deux a chascung coste dudict Seigneur
portantz le Voille qui estoit sur ledict ieune Duc, affin quil
ne traynast en terre; & estoit ledict seigneur Dorleans vestu
dunc Robe de drap Dargent, faict a grands figures, fourree
de Loups cerfueiz. En apres marchoit pompeusement le
Roy vestu de ses accoustremens Royaulx, tenāt le Sceptre
en la main, ayant vng Bonnet bien & richement garny de
Pierrerie, tellement que la lueur & resplendeur dicelles ren
doit les yeulx de ceulx qui regardoyent aussi confuz que
silz eussent regarde contre les Rayons du cler Soleil. Puis
estoit le Seigneur suyui du Roy de Nauarre, du Cardinal
de Frenez Legat Dauignon: des Cardinaulx de Lorraine,
de Meudon, de Richencourt & de Chastillon, ausq̃lz esto
yent portees les queues de leurs Cloches par aucūgs de leurs
gentilz Hommes. Apres marchoyent en tresque bel ordre
les Seigneurs de Guise, de saint Paul, le Duc de Montpen
cier, le Prince de la Roche suryon son frere, Mōsieur Dau
male filz de Monsieur de Guise, & le Côte de Roussi qui

estoit aussi bien & proprement vestu a mon aduis que tout
aultre; d'une Robe faicte en maniere de Casaque, de Drap
D'argent a Fleurs & Treffles de Bleu. Puis marchoyēt bra-
uement Monsieur le grand Admiral, le Seigneur de Boyss,
Bonniuet, Montpesat, & aultres grands gentils Hommes,
Messieurs les Ambassadeurs de Venise, du Pape, de Portu-
gal, & aultres gentils Hōmes en si bel ordre & grand nom-
bre que iceulx descriptre & nōmer avecq la richesse & triū-
phe qui la estoit feroit chose plus que prolixē, & croy selon
le iugement dung chascung quen Frāce ne sest iamais veu
tel triumphe ne si sumptueux, dont pour eūter prolixite ie
laisse cy. endroict a escrire & nommer les Archeuesques,
Euesques, & aultres Prelatz & gens d'estat de leur suite.

Après tout ce dessus marchoyent les dames, & après icel-
les quatre gentils hommes, & la Roïne après eulx avecq
deux aultres gentils hōmes qui luy portoyent la queue de sa
robe, & a madame Maguerite pareillemēt q la suyuoit, tou-
tes deux vestues a la mode de Frāce, de Robes de drap dor
bordees a lētour de Pierreries & perles, q faisoit merueilleu-
semēt bon veoir: les accoustremētz de tette, aornementz de
col a lequipolent excedant par oeuvre la richesse Dorphes-
urerie. Puis marchoyent apres la princesse de Nauarre, mes-
dames de saint Paul, Neuers, Montpēcier Destēpes, de Cas-
ny, & de Massy acōpaignedes de leurs gentils hōmes qui leur
portoyent les queues, le tout en si bel ordre que mieulx nest
possible. Icelles estoient suyuies de plusieurs aultres Dames
& damoyelles: aucunes a elles esgales en beaulte, aultres
les excedāt, nō pas en richesse d'acoustremēs. Et debuez sca-
voir que tous ceulx qui portoyēt les flambeaux, & torches
ne bougerēt, de la place ou des galleries es lieux ou estoient
designez, hors mys les cent gentils hōmes de la maison du
Roy qui marchoyent les premiers cōme dessus est dict. Da-
uantage y auoit par toutes les fenestres Lanternes, en si
grand nombre & quantite que neussiez veu linon lumiere,

car a chascune en y auoit selon l'espace & lieu où on les pou-
uoit mettre. Contre les murailles du Chasteau estoient assi-
chez gros crampons de Fer ou estoient mys les Flama-
beaux, le tout si bien accoustre que a veoir ce dessus, vous
eust semble estre chose faee, & eussiez estime a loeil voyant
qu'Engin humain neust peu comprendre faire les choses si
bien faictes, riches & sumptueuses. Pendāt le temps que ce
dessus se faisoit l'artillerie tiroit, & bombardoit de telle ma-
niere que mieulx me sembloit estre a l'ouyr au cāp de Mar-
rolles, ou de Luxēbourg, ou bien a l'assault ou prinse de quel-
que forte Ville, & d'autre part cōme ay deuātdict les haults
boys, Cornetz, Tabourins, & Phiffres faisoient si bien leur
debuoir de melodieuſemēt sonner que chascung demouroit
tout esbahy & de ioye rauy. Et a cause de la grand multitude
de monde qu'il estoit ceulx qui entroyent par le coste de
la Chappelle estoient cōtrainctz sortir par l'autre part de la
Court, tyrant a la Salle du Bal, & ne demoura personne en
ladicte Chappelle sinon le Roy, la Royne, & qlques vngs
des Cardinaulx dediez a solenniser ce diuin Sacrement: les-
quel faict & accompli, les trois Heraulx susdictz allerent
crier en trois pars du Chasteau a haulte voix, Viue le Duc
Francoys. Et ce faict toute la noblesse des Seigneurs &
Dames alla en ladicte Salle du Bal, excepte aucunes qui
conduyrent L'enfant en sa Chambre.

¶ Si en tout ce dessus y auoit eu triumphe & magnifi-
cence, encore fut l'excellence de la solennite en sumptuosite
& richesse plus grāde en lad. Salle: Car en p̄mier lieu estoit
vng Ciel tēdu tout de drap Dor & d'argent, les Chandeliers
pendantz en layr, d'argent, de valeur & facon admirable: puis
en ladicte Salle estoient desployez les deux Buffetz du
Roy, (Buffetz de parement) Lung Dor, & l'autre d'argent
dore: & estoient es deux costez vng peu plus bas q̄ le meil-
lieu de ladicte Salle, & auoit a chascūg Buffet quatre haults
Chandeliers garnyz de Cierges allumez, les Gardes & Ar

chers a l'entour d'iceulx, desq̃lz Buffetz la valeur & richesse
est incredible. L'adictē Salle estoit rendue a l'entour de Tap
pisserie toute neufue, tyllue entierement de fil dor, d'argent,
& de soye, ou sont pourtraictes les Batailles des Rōmans
& de Hānibal, ou iay bien repeu mes yeulx de regarder cho
se excellente, car a vray dire cest louuraige qui approche
mieulx du vif, les simetries, & mesures des personnaiges en
proportion que iaye iamais ouy dire, veu, sceu, ny leu, & a
lequipolent sont les couleurs adaptees, les passaiges, verdus
res, boys, massonneries d'antique & vraye architecture par
artifice tres excellent. En l'adictē Salle, tant aux coings qu'au
meillieu y auoit de Coulonnes doricques, yonnicques, ruf
quanes, arcs triumphaulx avecq les soubasses & epistilles
de mesmes choses en tout, de grād Esprit & art, & a estimer
aultant que chose qui soit ailleurs, Mais de ce ne se fault es
merueiller, car tout ainsi que le Roy est hault & excellent
en Esprit, il ayme les choses de bon art & inuention, & les
hommes amateurs dicelles, tesmoing beaulcoup de sa maī
son & aultres, vers lesquelz il a vse & vse iournellement de
magnificence & liberalite Royale.

Le Festin du soupper finy, le Bal se dressa; dont le Roy
commença avecq Madame de saint Paul, Monsieur suy
uant avecq Madame Marguerite, Monsieur Dorleans a
uecq la Princesse de Nauarre, & consequemment tous les
aultres Princes & Seigneurs, qui estoit chose belle a veoir.
Puis le lendemain continuant tout ioyeux excercice, se fe
rent ioustes & Tournoyz en grande pompe, lesquelles cho
ses ie laisse en la consyderation de vostre Esprit, faisant fin
de mon Escrip. De Fontainebleau le .xj. de ce moys de Feb
urier. Mil cinq cens. xliij.

F I N I S.













